

Vorrede Vitruuij an den Groß- mechtigsten Keyser Augustum / in das vi. Buch der Architectur.



Vistippus ein berühmter Socratischer
 philosophus / als er durch vngewitter auff
 dem Meer gefehrlichen Schiffbruch erlit-
 ten vnd vom Meer an das gestat oder vfer
 der Rhodiser getriben ward vnd außge-
 schwommen / vermerckt er im Sand Geo-
 metrische Figuren vnd bezeichnung / dauon
 er bewegt / gegen seinen mit Gesellen tröst-
 lich sprach / sie solten behertziget vnd mutig
 sein / dann er het spur gesehen vnd vermerckt / das da Menschen
 wohnten / macht sie schnell auff / vnd eilet Rhodis zu / vnd besucht
 für das erst das Gymnasium / da selbst disputiert er Philosophi-
 scher weis / vnd ward mit geschenck vnd gaben reichlich verehret /
 also das er nit allein für sich nach notturfft begabt ward / sonder
 das er auch seinen mitgesellen dauon Kleidung vnd andre steur mit
 theilen mocht nach notturfft. Als sich aber sein mitgesellen wider
 auff die fart in jr heimat vnd Vatterland zuziehen begeben wol-
 ten / besprachen sie in ob er nichts heim zuentbieten het / hat er in bez-
 folhen daheim also anzusagen. Das man den Kindern ein solches
 zergelt / vñ ein solche hab verschaffen / welche sie auch in einē Schiff-
 bruch möchten mit sich daruon bringen / vnd damit außschwimmen /
 dan dasselbig weren die fürnembsten güter vnd beste hab / welche
 kein fortuna des Meers oder vngewitters / noch Kriegs vnfall /
 oder andere zerstörung gemeins nutz schaden oder nachtheil bringē
 möchtē. Diser meinung ist Theophrastus ein namhaftiger Phi-
 losophus nit allein gleich hellig gewesen / sonder ein bestettiger / so
 er wil das man mehr auff Kunst / dan auff gelt achten vnd trachtē
 sol vnd drauff verlassen / dann er spricht / das allein der gelert vnd
 erfahren / vnder aller Welt weder in der frembd einig vnd frembd /
 oder in abwesen der verwanten vnd gefreunden / mangel an freun-
 den vñ gönnern habe / sonder wo er hin kumme find er allezeit seinē
 platz / vnd mög allein alles sein vnglück / vnd was im vberzwerch
 zuhanden gieng an alle entrüstung tragen vnd nit zu hertzen gehn
 lassen / dan er wolt auch vñ hielt ganz dafür / das die so sich mehr
 auff Gut / dann auff Kunst verliessen / auff einer helen vñ schlupfferi-
 gen